


Tebtir wuu te wnaa ne kesentyent rlaan gap bad. Lex neguin wka men te bad. Zhich guin wbeeky ma dxit; wyalse wbeeky ma dxit, wakzhoob maa, lex wxob men maa, wguu men chibtxup dxit lenxpaan maa.

Le chene wluzh tson xman wa men wii, nuu lextoo men gan pe che wats xbad men, per ni te ma gardet gats. Wra gyëël guin wague men wii ste; chene wii men le te badyeen che nuu. Nuu lextoo men: “Gyed gatsre maa”. Chene wra ste gyëël, wague men wii ste, per ni ste ma watsdetre. Yrandxee dxit wyee. Orguin nuu lextoo men: “Mase te badree yroo porke kesentyent rlaan noo gap noo bad”.



Chene wra ste gyëël, wa wnaa guin wii lenftxëës; nonchee badyeen nuu; yëtetre badgol. Wzhoon badgol porke

kesentyent ndxiin zhiin badgol wzak badgol. Orguin wboo mén guin badyeen lenftxëës, lex wapkwent men ma axtegue ne le ma wroo.

Te dxe wnabdiiz ma lo men, re maa:


—¿Txu nak xnaa noo? Rlaan noo ynebeey noo xnaa noo.



Wke mén guin re men lo maa:

—Noo nak xnaa de, porke noo wapkwent de axtegue ne le de wroo.

Per wlaleedxdet bad guin men. Zenga ka maa. Tebegue wlen lextoo ma, re maa: “Yruu noo tsa noo tsaye noo xnaa noo gan pe tsëldet xnaa noo lo noo”. Lex wka ma nëz za maa; wdxiiñ ma ledne zob te konej; wnabdiiz ma lo konej re maa:




—¿Pe laa de nak xnaa noo?

Wke konej re konej:

—¿Pezee gak noo xnaa de?, si kesentyent ndxiin de.

Nlesche wuu lextoo bad guin ne won ma ndxiin maa. Lex wka ma næz za ma ste; wdxiiin ma lo te mëkzhiil; wnabdiiz ma re maa:

—¿Pe laa de nak xnaa noo?




Wzelo mëkzhiil rzhidxno mëkzhiil maa, re  
mëkzhiil:

—¿Pezee gak noo xnaa de?, si wdee lo beey  
ndxiin de, no doob ndxiib led de, le led noo ndxiib  
zhiil; no tap nii noo zob, le laa de txupegue nii de  
zob.

Orguin nuu lextoo bad guin: “Pazer nli rnii  
ménro cheguin gon ne laa men nak xnaa noo, porke  
txupegue nii men zob, per nonchegue ne yëtet doob  
led men”.

Orguin wka bad guin nëz, wzaa ma stebla;  
wdxiiin ma lo te zhanbëë; lex wnabdiiz ma lo  
zhanbëë, re maa:

—¿Pe laa de nak xnaa noo?



Wke zhanbëë re zhanbëë:

—¿Pezee gak noo xnaa de?, si kesentyent ndxiin de.


Orguin wzelo bad guin roon ma roon maa, re maa: “¿Penak yrandxee maa ne rtsëlo noo na lo noo ne ndxiin noo? ¿Pezee le men ne wtxoo noo nunk nadet men lo noo ne ndxiin noo?, lel kesentyent ryaan men noo. Mejordee yberee ke noo lo men. Pazer nli ne laa men nak xnaa noo, noze ne che wlag doob led men, neguin bet doob yëtet led men”.

Ne wii zhanbëë roon bad guin, re zhanbëë lo maa:

—Belne rlaan de, noo tsano de lo maa ne rzaglo de, lex nga ye de xnaa de.

—Zaw —re bad guin.

Wka ma nëz zanal ma zhanbëë. Wdxinno zhanbëë ma ledne ndxin tebëd bad. Lex wbig ma lo te bad guin, re ma:





—¿Pe laa de nak xnaa noo?

Wke bad guin re maa:

—Let noodet nak xnaa de, per belne rlaan de,  
noo tsa tsano de lo xnaa de.

—Zaw —re maa; kesentyent rzhiilen maa. Lex  
wa bad guin wano ma ma lo bad ne nak xnaa maa;  
lex wnabdiiz ma lo xnaa ma, re maa:

—¿Pe laa de nak xnaa noo?



Wke bad guin ne nak xnaa ma re maa:

—Nli too nak xnaa de, per wzhoo noo lo de  
porke kesentyent ndxiin de. Wtuunen noo ntxoo noo  
de por tant ndxiin de. Orrenaa, ¿penak zëed de  
ledne zu noo? Gusaa; rlaandet noo kwii noo de  
porke wdee lo beey ndxiin de.

Orguin wzelo bad guin roon ma roon ma ne won  
ma ne por ne ndxiin ma wzhoo xnaa ma lo maa.

Ne wii ste bad guin ne baanske roon maa, wles  
lextoo ma maa, re ma lo maa:


—Si ndxiindet de, noze nzël xnaa de. Tsukasdet de xnaa de. Mazdee yoo gya be ruxyuu noo.

Orguin re bad guin:

—Nlidet rnii de si yrandxee maa ne zatsëlo noo na lo noo ne ndxiin noo. Axtegue xnaa noo na lo noo ne ndxiin noo; mazdee le noo gya ke lo mén ne wtxoo noo. Laa men si nunk nadet men lo noo ne ndxiin noo, lel kesentyent ryaan men noo.

Orguin re bad guin lo maa:

—Oo, gyadet de; gukwii gante, por laa ménro ne wtxoo de, bet zadet lextoo men belne ndxiin de o zhaandxee de. Chene ylaanse men ynëëz men de, yket men de, gu men de. Por neguin nak ne wtxoo men de.



Wdxe ma ne won ma ne re ste bad guin zenga lo maa. Lex wka ma næz syanal ma bad guin ruxyuu bad guin. Nga wuu ma yrup maa. Kesentyent ndal

mëëd wap maa, no kesentyent wyaan ma zhiin maa.  
Wlaadet ma zhiin ma zegne wlaa xnaa ma maa.

Netegue wluzh xkwent bad guin.

